

**Perutusan Yang Berhormat Menteri Kebudayaan, Belia dan Sukan  
Sempena Hari Keluarga Antarabangsa 2026  
“International Day of Families 2026”**

---

1. Hari Keluarga Antarabangsa yang disambut pada **15 Mei** setiap tahun merupakan satu inisiatif global yang diiktiraf oleh Pertubuhan Bangsa-Bangsa Bersatu (PBB) bagi menekankan peranan penting institusi keluarga dalam pembangunan sosial, ekonomi dan budaya sesebuah negara. Negara Brunei Darussalam turut menyambut Hari Keluarga setiap hari Ahad pertama dalam bulan Mei setiap tahun sebagai manifestasi komitmen berterusan dalam memperkukuh institusi keluarga sebagai teras kesejahteraan rakyat dan kestabilan negara. Ini juga selaras dengan komitmen Negara Brunei Darussalam selaku anggota ASEAN, melalui Deklarasi Bandar Seri Begawan mengenai Kepentingan Keluarga Dalam Pembangunan Masyarakat dan Pembinaan Negara 2021.
2. Tema sambutan tahun ini, “**Keluarga, Ketidaksamaan dan Kesejahteraan Kanak-Kanak**” (*Families, Inequalities and Child Wellbeing*), mengetengahkan **cabaran global** yang semakin ketara, khususnya **ketidaksamaan sosial dan cabaran ekonomi** yang **mempengaruhi kestabilan sesebuah keluarga** seperti kebimbangan ekonomi, peningkatan kos sara hidup, serta jurang akses kepada pendidikan, perkhidmatan kesihatan dan peluang kehidupan. Cabaran-cabaran ini setentunya menjejaskan keupayaan keluarga dalam menyediakan persekitaran yang positif, stabil dan kondusif untuk menyokong perkembangan kanak-kanak yang seimbang dari segi fizikal, emosi dan sosial. Oleh itu, pengukuhan institusi keluarga perlu dilihat sebagai satu pelaburan jangka panjang dalam pembangunan modal insan negara.
3. Alhamdulillah, di Negara Brunei Darussalam, melalui pelaksanaan pelbagai inisiatif, pendekatan intervensi keluarga di negara ini semakin bersifat menyeluruh, strategik dan berfokus kepada pemulihan serta pengukuhan fungsi keluarga. Berdasarkan kes keluarga yang dirujuk ke Jabatan Pembangunan Masyarakat sejak tahun 2000 hingga 2025, kes yang dirujuk ke Unit Keluarga menunjukkan penurunan sebanyak 58% pada tahun 2025 berbanding tahun sebelumnya, iaitu daripada 62 kes kepada 26 kes. Perkembangan ini mencerminkan keberkesanan pendekatan intervensi awal, kaunseling keluarga, mediasi serta sokongan kebajikan bersasar yang membantu keluarga menangani konflik secara lebih konstruktif. Walau bagaimanapun, sebahagian kes yang masih dirujuk melibatkan isu kompleks seperti pertikaian hak penjagaan anak, nafkah dan kewangan serta masalah tempat tinggal. Ini menunjukkan bahawa cabaran sosio-ekonomi adalah antara faktor yang mempengaruhi kestabilan keluarga, dan justeru memerlukan pendekatan yang lebih bersepadu merangkumi aspek sosial, ekonomi dan perundangan.

4. Dalam aspek kesejahteraan kanak-kanak, kes yang direkodkan turut menjadi petunjuk penting kepada keperluan untuk terus memperkukuh sistem perlindungan dan sokongan keluarga. Kes kanak-kanak telah menunjukkan penurunan kepada 172 kes pada tahun 2025 berbanding 188 kes pada tahun 2024. Walaupun perangkaan ini masih menuntut perhatian serius, perkembangan tersebut mencerminkan keberkesanan pelbagai usaha yang telah dilaksanakan termasuk peningkatan kesedaran masyarakat, pengukuhan program keibubapaan positif, intervensi awal terhadap keluarga berisiko serta kerjasama antara agensi dalam memperkukuh mekanisme pemantauan dan perlindungan kanak-kanak. Dalam memastikan setiap kes ditangani dengan berkesan, pendekatan yang dilaksanakan adalah berpandukan prinsip *kepentingan terbaik kanak-kanak*, melalui penilaian sosial yang menyeluruh, intervensi bersepadu serta penyelarasan sokongan antara agensi, bagi memastikan persekitaran keluarga kekal stabil, selamat dan kondusif untuk perkembangan kanak-kanak secara holistik.
5. **Sambutan Hari Keluarga Kebangsaan (HKK)** sejak tahun 2012 turut menjadi wadah utama dalam penyelarasan usaha senegara untuk memperkukuh nilai dan ikatan kekeluargaan. Pada tahun ini, sambutan diadakan pada 3 Mei 2026 dengan tema ***“Keluargaku Harapanku”*** dan fokus ***“Menerapkan Nilai-nilai Teras Kekeluargaan Brunei: Sayang-menyayangi; Tanggungjawab; Hormat-Menghormati; Pemedulian (SaTu HaraPan)”***.
6. Pelbagai aktiviti dan inisiatif bersempena Hari Keluarga Kebangsaan (HKK) 2026 telahpun dirancang sebagai usaha bersama mengukuhkan institusi keluarga dan memberikan peluang meluangkan masa berkualiti bersama ahli keluarga, dan orang ramai adalah digalakkan untuk menganjurkan ataupun ikut serta dalam aktiviti dan program kekeluargaan dan aktiviti/program berasaskan komuniti di peringkat keluarga masing-masing, agensi kerajaan, swasta, NGO, Majlis Perundingan Mukim dan Kampong, sepanjang tahun.
7. Pada tahun ini, kita akan melancarkan **Pelan Tindakan Institusi Keluarga 2025–2029**, susulan dari Pelan Tindakan sebelum ini. Melalui Pelan Tindakan ini, komitmen senegara dalam mengukuhkan institusi keluarga terus ditekankan dengan memberi tumpuan kepada kedayatahan keluarga, pembangunan kapasiti keluarga, pengukuhan sokongan sosial dan ekonomi serta pemantauan berasaskan indikator keberhasilan seperti Indeks Kedayatahan Keluarga (***Family Resilience Index***) yang akan dirangka berasaskan Indeks Kesejahteraan Keluarga ASEAN (***ASEAN Family Wellbeing Index***) yang sedang dibangunkan di peringkat serantau.
8. Adalah diharapkan agar semua pihak samada dari agensi kerajaan, swasta, persatuan-persatuan, institusi-institusi, pemimpin akar umbi dan seluruh masyarakat akan terus berganding bahu dalam memastikan setiap keluarga di negara ini mendapat sokongan yang sewajarnya. Oleh itu, marilah kita sama-sama berdoa ke hadirat Allah Subhanahu Wa Ta’ala, agar Negara Brunei Darussalam terus maju

dalam suasana yang aman, Makmur dan rukun damai demi Raja, Negara, Bangsa dan U gama serta sentiasa berada di bawah perlindungan dan rahmay-Nya. Semoga setiap keluarga di negara ini terus dikurniakan kebahagiaan, kesejahteraan dan keharmonian ke arah merealisasikan sebuah negara *Baldatun Tayyibatun Wa Rabbun Ghafur*.

***Selamat Hari Keluarga Antarabangsa 2026  
kepada semua keluarga di Negara Brunei Darussalam.***

**“Terapkan Nilai-nilai Kekeluargaan Brunei:  
Sayang-menyayangi, Tanggungjawab, Hormat-Menghormati, Pemedulian  
(SaTu HaraPan)”**